

ACTA Nº 5/2012

CONCELLO DE PARADELA

PROVINCIA DE LUGO

---

**ACTA DA SESIÓN EXTRAORDINARIA, CELEBRADA POLO PLENO CORPORATIVO MUNICIPAL O DÍA SETE DE AGOSTO DE DOUS MIL DOCE.**

En Paradelas, a sete de agosto de 2012.

No Salón de Sesións da Casa Consistorial, sendo as trece horas e cinco minutos, reúnen-se en primeira convocatoria a Corporación Municipal en Sesión Extraordinaria, baixo a Presidencia do Alcalde, D. José Manuel Mato Díaz e coa asistencia dos Srs. Concelleiros.

- D. GUILLERMO CASTRO GONZÁLEZ
- D. ELISEO LÓPEZ RODRÍGUEZ
- D<sup>a</sup> M<sup>a</sup> MONTSERRAT MULET SAR
- D<sup>a</sup> M<sup>a</sup> TERESA VEIGA RODRÍGUEZ
- D. SECUNDINO PÉREZ LÓPEZ
- D. MANUEL REGUEIRO LÓPEZ
- D. BENJAMÍN LÓPEZ MATO
- D<sup>a</sup> ANA BELÉN LÓPEZ ÁLVAREZ.
- D. SENÉN LÓPEZ GARCÍA

Non asiste a Sr. concelleira D<sup>a</sup> SONSOLES LÓPEZ IZQUIERDO xustificando a súa ausencia ao atoparse de viaxe.

Asiste o Secretario-Interventor da Corporación, José López González, que da fe do acto.

A continuación procédese a coñecer dos asuntos incluídos na orde do día.

**1º.- APROBACIÓN, SE PROCEDE, DA MOCIÓN PRESENTADA A INSTANCIA DAS ORGANIZACIÓN PROFESIONAIS AGRARIAS: UNIÓN AGRARIAS, ASOCIACIÓN AGRARIA XÓVENES AGRICULTORES E SINDICATO LABREGO GALEGO RELATIVA Á SITUACIÓN CRÍTICA DO SECTOR LÁCTEO EN GALICIA.**

O Sr. Alcalde-Presidente di que este Pleno xurde da decisión adoptada polos Sindicatos Agrarios, tras reunións levadas a cabo nas comarcas, a que asistiu o Concellerío D. Benjamín López Mato, no que se acordou celebrar o Pleno a mesma data e a mesma hora nas comarcas de Sarria, Chantada e na de Lemos.

A continuación procedeu á lectura dun argumentario do acadado polo Partido Popular e pola Xunta de Galicia no sector lácteo e agrario en xeral ao longo dos últimos anos.

Tomou a palabra o voceiro do Grupo Municipal Socialista D. Guillermo Castro González dicindo que o mercado de fóra e os prezos son difíciles de cambiar, pero o que non pode haber son esas diferenzas no mercado interior e o que non ten ningún sentido e que os custes se incrementan continuamente e o prezo do leite non pare de baixar.

Seguidamente, o Sr. Alcalde de Paradela da traslado ao Pleno da Moción presentada polas organizacións profesionais agrarias, UNIÓN AGRARIAS, XÓVENES AGRICULTORES e SINDICATO LABREGO GALEGO, con entrada no Rexistro do Concello o día 1 de agosto de 2012 (rex. entrada núm. 817).

O tenor literal da Moción é o seguinte:

*“As organizacións profesionais agrarias, UNIÓN AGRARIAS, XÓVENES AGRICULTORES e SINDICATO LABREGO GALEGO trasladan ós Grupos políticos con presenza nesa Corporación Municipal para que, de acordo co establecido nos artigos 91.4 e 97 do Regulamento de Organización, Funcionamento e Réxime Xurídico das Entidades Locais, sexa presentada para o seu debate e aprobación polo Pleno a **MOCIÓN** que a continuación se recolle:*

#### **EXPOSICIÓN DE MOTIVOS**

*O rural de Galicia está a afrontar un tempo de incertezas económicas agravado en boa medida polo diferencial de prezos do leite con España e Europa. Os gandeiros galegos son os que reciben un prezo máis baixo polo seu leite de toda España. En maio de 2012 os gandeiros galegos recibiron 29,2€/100 litros, que está un 5,5% por baixo do prezo medio estatal e un 15,61% por baixo do que perciben os produtores valencianos. As diferenzas de prezo entre Comunidades Autónomas danse incluso entre gandeiros que entregan á mesma empresa.*

*Respecto do prezo percibido polos gandeiros galegos é un 5,48% inferior ao de Portugal, un 1,10% inferior ao de Francia, un 5,65% inferior ao de Alemaña e un 12,16% inferior ao de Holanda.*

*Unha situación que se veu agravada pola suba dos custos de produción e a seca que vivimos a última primavera. Así, nos últimos anos os custos de produción e o prezo do leite evolucionaron de maneira moi diferente: os fertilizantes, os combustibles, a electricidade e o penso para vacún de leite experimentaron subas espectaculares mentres que o prezo do leite apenas experimentou cambios. Dende o ano 2005 os ingresos por venda de leite subiron un 0,9% e os custos de explotación subiron un 29,6% (os alimentos para o gando subiron un 33,9%, os fertilizantes un 60,2%, os gastos enerxéticos un 50,4%) o que motivou unha caída da renda do 43%.*

*Estes factores debuxan, en definitiva, un escenario pouco alentador para os que vivimos do sector primario en Galicia. Tal é así, que o lácteo galego está ao borde da súa desaparición e con el non só un tecido económico que da emprego a mais de 66.000 persoas na nosa Comunidade Autónoma, entre emprego directo, indirecto e inducido, asentado no rural, en pequenos autónomos, en actividades coma a construción, o comercio, a hostalería, talleres, servizos de contratación de maquinaria e outros. É un feito ben sabido que moitas das comarcas do rural galego teñen unha*

*total dependencia económica do sector, pois a redución nos ingresos do leite reduce á súa vez os ingresos*

### **FOLLA Nº 3**

*doutras actividades das zonas rurais, que contribúen de xeito capital ao mantemento dun medio cada vez máis despoboado.*

*As organizacións de produtores trasladámoslle ao Presidente da Xunta de Galicia o pasado día 5 de xuño no marco da Mesa do Leite, a necesidade de impulsar diante do Goberno do Estado unha iniciativa política urxente e contundente que impida o estrangulamento financeiro do sector lácteo. Así mesmo, fixemos fincapé na importancia do impulso dun acordo entre industria, produtores e Administración para acadar unha postura común diante da distribución de cara a impedir que as explotacións galegas, a pesar de teren un mercado de proximidade deficitario de leite, vexan como as francesas perciben un maior prezo a pesar de estar nun marco claramente excedentario.*

*A día de hoxe seguimos sen solucións, e a situación do sector é aínda máis sombría, xa que dende entón, producíronse novas baixadas de prezos ó produtor, e pola contra, as materias primas para a fabricación de pensos, seguiron disparándose, especialmente a soia.*

*Polo exposto, as organizacións profesionais agrarias, UNIÓN AGRARIAS, XÓVENES AGRICULTORES e SINDICATO LABREGO GALEGO, SOLICITAN a presentación desta MOCIÓN diante do pleno da corporación municipal de Paradela, para apoiar nas administracións correspondentes, e solicitar do Presidente da Xunta de Galicia o seguinte paquete de medidas:*

*1º Esixir aos Ministerios de Agricultura e Economía que non permitan que a distribución francesa e alemá nos trate como o sumidoiro para a súa produción láctea a custa de arruinar zonas produtoras como Galicia.*

*2º Que no exercicio das súas responsabilidades tome as iniciativas oportunas para impedir a discriminación de prezos que as empresas exercen sobre o leite galego, articulando mesas de negociación entre produtores, industria e distribución semellantes as que se deron en países veciños como Francia.*

*3º A posta en marcha dun observatorio de prezos das materias primas, que permita valorar a súa evolución de xeito transparente.*

*4º Que formule nas instancias que corresponda e con urxencia, as modificacións normativas que aseguren unha aplicación axeitada dos contratos no sector lácteo. A pesar do inmediato destes cambios, algunhas cuestións legais están pendentes de regular, tales coma os criterios de fixación do volume nos contratos ou a necesidade de regular a figura do mediador con capacidade de resolver discrepancias entre produtores e industria.*

*5º Que traslade á Consellería do Medio Rural a necesidade de reforzar as partidas de axudas á modernización das explotacións e, sobre todo, que actúe de xeito decidido contra o déficit de terra que padecen as explotacións galegas, que está a*

*limitar a rendibilidade das mesmas e a comprometer o futuro das axudas europeas que estarán ligadas á superficie agraria.*

*Xullo de 2012*

**FOLLA Nº 4**

*SR. /SRA. PRESIDENTE/A DA CORPORACIÓN MUNICIPAL”.*

Procédese á votación da Moción, que resulta aprobada pola unanimidade dos dez Concelleiros que asisten ao Pleno da Corporación, (nove do Grupo Municipal do Partido Popular e un do Grupo Municipal Socialista), sendo once o número legal de membros.

Acórdase, asemade, tal e como propuxeron nas reunións os sindicatos agrarios que a presente sesión plenaria non sería retribuída aos Concelleiros.

**E non habendo máis asuntos que tratar, o Presidente levantou a sesión sendo as trece horas e trinta minutos do sete de agosto de dous mil doce, exténdose a presente acta da que coma Secretario-Interventor dou fe.**

**Visto e prace**

**O Alcalde**

**O Secretario-Interventor**